

thiab muab tsuj tseg kom hnub qab tom lub ntsis hmab dib hlav ncav hmab taub, plaj tshoob ntsis kos hlav tuaj sib sua, ua tshoob ua kos kom ua dawb ua huv, thiab txwv tsis pub muab plaub ntug xaiv lus saum tsoom kwv tij uas tsis yog tus ntxhais niam thiab txiv teeb meem los cuam tshuam tshoob kos.

TSHOOJ I – FEEM II - TXHEEJ II: KEV RHUAV NTAWM LUB TXHOOJ

TII-01. Yog ib tug nres xeem twg tsa cuab tsa yim rau nws tub nws ntxhais, tab sis nws tsis tsuj tus roj rhais tus hnuev uas Hmoob 18 Xeem tau teeb tseg hauv lub txhooj, Hmoob 18 Xeem yuav tau nrog tus nres xeem ntawd tus thawj coj tham raws li hauv qab no:

A. Koj yuav tsum thim cov nqi tshoob uas koj tau quab yuam kom tus vauv them tshaj li lub txhooj uas Hmoob 18 Xeem tau teeb tseg lawm rov qab rau tus vauv tsis pub dhau 30 hnub.

B. Yog koj tsis thim qhov nqi tshoob uas koj tau sau tshaj li lub txhooj tau teeb tseg lawm rov qab rau tus vauv ua ntej 30 hnub, koj yuav tau raug tshem tawm hauv Hmong 18 Council Inc. thiab tus thawj coj ntawm koj lub xeem yuav nrhiav ib tug tshiab tuaj hloov koj tsis pub kom dhau 3 lub hlis, thiab thim qhov nqi tshoob uas koj tau sau tshaj lawm rov qab rau tus vauv.

TII-02. Yog koj ib tug pej xeem twg lam yuam cai sau nqi tshoob tshaj li lub txhooj tau teeb tseg lawm, koj yuav tsum mus nrog tsev neeg ntawd tham kom haum xeeb thiab ua raws nraim li lub txhooj tshoob no xwb. Yog koj hais tsis tau, koj muaj cai coj mus rau Hmong 18 Council, Inc. pab koj hais kom tsev neeg ntawd to taub, vim lub txhooj no yog Hmong 18 Council Inc. txhim kho los rau peb tsoom Hmoob sawv daws coj.

TII-03. Li no, Hmong 18 Council, Inc. thiaj li tau muab tshaj tawm rau peb tsoom Hmoob sawv daws paub, thiab coj raws

nraim li lub txhooj no, peb tsoom Hmoob txoj kev txhawj xeeb thiaj li yuav ploj mus.

TSHOOJ II: TXOJ CAI KAB TSHOOB KEV KOS

Txoj cai nyob hauv Hmoob cov tshoob kos nws sib txawv raws hom tshoob uas tab tom ua ntawd. Yog peb phwb hom tshoob twg, peb yuav tau taug hom tshoob ntawd txoj cai raws li Hmoob 18 Xeem lub txhooj. Yog leej twg yuam cai, tus ntawd yuav tau ris lub txim kheej. Yog li, Hmoob 18 Xeem thiaj tau muab txoj cai tshoob kos no teeb tseg rau Hmoob siv lawm yav tom ntej.

TSHOOJ II – FEEM I:

TUAM CHOJ TSHOOB

Kev tuam choj tshoob, Hmoob 18 Xeem tau muab teeb tseg ua ob (2) nqe raws li hauv qab no:

A. Yog tshoob tshiab tshiab xwb, Hmoob 18 Xeem thov txwv tsis pub tuam choj tshoob. Vim tshoob kos tshiab tshiab, tsis muaj txoj cai los tuam choj tshoob, yuav tsum muaj chaw tuam thiaj li tuam tau.

B. Rawls li Hmoob 18 Xeem tau ntsuam xyuas txog kev tuam choj tshoob, kev tuam choj tshoob yuav tsum yog muaj teeb meem tshwm sim yav tag dhau los rau ob (2) tog niam txiv, mas thiaj li muaj txoj cai tuam choj tshoob tau. Teeb meem xws li:

1. Yog muaj keeb kwm ntawm ob (2) tog niam txiv no tej tub tej ntxhais tau sib qaws los ua neej, txha tsis khov, ua neej nqaj tsis nto ntuj ploog tsis kawg ntsis, nkauj muam nraug nus tau sib txiav, choj lov kev tu, thiaj li muaj cai tuam choj tshoob tau.

2. Kev tuam choj tshoob, yuav tsum tuam raws li keeb kwm kev cai tuam choj tshoob. Kev tuam choj tshoob, txwv tsis pub tuam tshaj **\$200.00**.